

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
ԱՇԽԱՏԱԿԱՐԳԱՅԻՆ ՈՐՈՇՈՒՄԸ**

**ՀՀ ՍԱՀՄԱՆԱԴՐԱԿԱՆ ԴԱՏԱՐԱՆԻ 2013Թ. ՓԵՏՐՎԱՐԻ 12-Ի ՍԴԱՌ-10
ԱՇԽԱՏԱԿԱՐԳԱՅԻՆ ՈՐՈՇՈՒՄԸ ՎԵՐԱՆԱՅԵԼՈՒ ՄԻՋՆՈՐԴՈՒԹՅԱՆ ՎԵՐԱԲԵՐՑԱԼ**

ՀՀ սահմանադրական դատարանի թիվ 1 դատական կազմի՝ 2013 թվականի փետրվարի 12-ի ՍԴԴԿՈ/1-4 որոշմամբ քաղաքացի Նարինե Մկրտչյանի դիմումով գործը՝ ՀՀ ընտրական օրենսգրքի 23-րդ հոդվածի 3-րդ մասի 1-ին և 2-րդ նախադասությունների, 24-րդ հոդվածի, 38-րդ հոդվածի 7-րդ մասի, 79-րդ հոդվածի 4-րդ մասի 2-րդ կետի և 80-րդ հոդվածի՝ Հայաստանի Հանրապետության Սահմանադրությանը համապատասխանության հարցը որոշելու վերաբերյալ, ընդունվել է քննության, իսկ սահմանադրական դատարանի 2013 թվականի փետրվարի 12-ի ՍԴԱՌ-10 աշխատակարգային որոշմամբ վերոհիշյալ գործի դատաքննությունը նշանակվել է 2013 թվականի մարտի 5-ին՝ գրավոր ընթացակարգով:

Դիմողը՝ 15.02.2013թ. սահմանադրական դատարանում մուտքագրված իր գրավոր միջնորդությամբ խնդրել է գործի դատաքննությունն իրականացնել բանավոր ընթացակարգով՝ պատճառաբանելով, որ իր դիմումով «բարձրացված հարցերի վերաբերյալ առկա է հասարակական մեծ հետաքրքրություն», հետևաբար, միջնորդում է իր դիմումի դատաքննությունն անցկացնել բանավոր ընթացակարգով:

Ուսումնասիրելով միջնորդությունը, ներկայացված փաստարկները, դիմումը և գործում առկա մյուս փաստաթղթերը, սահմանադրական դատարանը գտնում է, որ առկա չեն դիմող կողմի միջնորդությունը բավարարելու անհրաժեշտ հիմքեր՝ հետևյալ հիմնավորումներով:

1. Սահմանադրական դատարանն իր՝ 11.04.2012թ. ՍԴՈ-1020 որոշմամբ՝ քննության առնելով ՀՀ վարչական դատավարության օրենսգրքի 138-րդ հոդվածի՝ ՀՀ Սահմանադրությանը համապատասխանության հարցը որոշելու վերաբերյալ գործը, հանգամանորեն անդրադարձել է նաև գրավոր և բանավոր դատավարական ընթացակարգերի էությանն ու բովանդակությանը, դրանց կիրառման առանձնահատկություններին և միջազգային պրակտիկային՝ արտահայտելով մի շարք իրավական դիրքորոշումներ: Մասնավորապես, կարևորելով այդ ընթացակարգերի կիրառման անհրաժեշտությունն արդարադատության մատչելիության, գործերի

դատաքննության հրապարակայնության, քննության առարկա փաստերի ու այլ հանգամանքների լրիվ, բազմակողմանի, օբյեկտիվ ուսումնասիրման ու գնահատման և արդար որոշումների կայացման գործում, սահմանադրական դատարանը՝ ելնելով նաև Մարդու իրավունքների եվրոպական դատարանի նախադեպային իրավունքում ամրագրված սկզբունքներից, գտել է, որ դատաքննության գրավոր ընթացակարգն սկզբունքորեն կիրառելի է, եթե.

- բացակայում է դատական գործով փաստական հանգամանքների բանավոր քննության անհրաժեշտությունը կամ, եթե դատարան ներկայացված նյութերի (փաստաթղթեր և այլն) բանավոր ուսումնասիրումը (քննությունը) վիճարկվող հարցի հետագա հստակեցմանը չի նպաստելու,

- անհրաժեշտ է կանխել հանրային շահերին սպառնացող վտանգը կամ լուծել դատարանի կողմից ժամանակավոր միջոցներ կիրառելու հարցը,

- գործի հետ կապված հանգամանքների պարզումն այլ կերպ (բանավոր քննությամբ) անհնարին է,

- դատարանն անհրաժեշտ է համարել որոշում կայացնել գործում առկա գրավոր փաստաթղթերի հիման վրա,

- անհրաժեշտ է հավելյալ երաշխիքներ ապահովել դատաքննության մասնակիցների իրավունքների իրացման համար և այլն:

Բացի վերոհիշյալ իրավապայմաններից, սահմանադրական դատարանը յուրաքանչյուր դեպքում գործի քննության ընթացակարգի վերաբերյալ որոշում կայացնելիս նախ առաջնորդվում է «Սահմանադրական դատարանի մասին» ՀՀ օրենքի պահանջներով: Մասնավորապես, հիշյալ օրենքի 68-րդ հոդվածի 6-րդ մասի համաձայն՝ Սահմանադրության 100-րդ հոդվածի 1-ին կետով նախատեսված գործերը սահմանադրական դատարանը քննում է գրավոր ընթացակարգով, բացառությամբ այն դեպքերի, երբ տվյալ գործը սահմանադրական դատարանի գնահատմամբ ձեռք է բերել հասարակական այնպիսի մեծ հնչեղություն, երբ անհրաժեշտ է հրապարակայնորեն որոշակի փաստական հանգամանքներ քննության առարկա դարձնել՝ նկատի ունենալով, որ գործի բանավոր դատաքննությունը կնպաստի գործի հանգամանքների առավել արագ

բացահայտմանը: Համանման հիմնավորումներով է, օրինակ, սահմանադրական դատարանը կայացրել 29.04.2011թ. ՄԴԱՌ-32, 11.05.2012թ. ՄԴԱՌ-29 աշխատակարգային որոշումները:

Հիմք ընդունելով «Սահմանադրական դատարանի մասին» ՀՀ օրենքի վերոհիշյալ պահանջները՝ սահմանադրական դատարանը գտնում է, որ սույն գործով առկա չեն այնպիսի հանգամանքներ, որոնք արտացոլված չեն դիմողի փաստարկներում: Օրենքի նորմի սահմանադրականության վերաբերյալ դիմողի մոտեցումները հստակ շարադրված են դիմումում, ինչպես նաև դիմողը հնարավորություն կունենա իր լրացուցիչ մոտեցումները ներկայացնել պատասխանողի դիրքորոշումների վերաբերյալ՝ սահմանադրական դատավարության ընթացակարգերով նախատեսված շրջանակներում: Սահմանադրական դատարանը գտնում է, որ դիմումում բարձրացված հարցերի բովանդակությունը, դրանց վերաբերյալ դիմողի ներկայացրած փաստարկները և գործում առկա փաստաթղթերը բավարար հիմք են գրավոր ընթացակարգով դատաքննությունն իրականացնելու և որոշում կայացնելու համար, առավել ևս, երբ այդ ընթացակարգով դիմումի ուսումնասիրման գործընթացն արդեն իրականացվում է:

Ելնելով վերոգրյալից և ղեկավարվելով «Սահմանադրական դատարանի մասին» ՀՀ օրենքի 47-րդ հոդվածով, 61-րդ հոդվածի 3-րդ և 6-րդ մասերով, 68-րդ և 69-րդ հոդվածներով, Հայաստանի Հանրապետության սահմանադրական դատարանը **ՈՐՈՇԵՑ**.

Դիմողի միջնորդությունը՝ ՀՀ սահմանադրական դատարանի 12.02.2013թ. ՄԴԱՌ-10 աշխատակարգային որոշումը վերանայելու վերաբերյալ, մերժել:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՍԱՀՄԱՆԱԴՐԱԿԱՆ ԴԱՏԱՐԱՆԻ
ՆԱԽԱԳԱՀ**

Գ. ՀԱՐՈՒԹՅՈՒՆՅԱՆ

22 փետրվարի 2013 թվականի
ՄԴԱՌ-11